

Isaias 52:13-15

13. K'elawik ja ka'tujumi jel ja jas oj sta'i, oj cho niwanb'uk, oj cho aji' k'e' cha'an sok oj cho ajuk b'a cha'anlek.

14. Jelni jitsan ja ma' oj ch'ak kan jakan ja b'a we'ni, ja b'a jastalni jomjini ja b'a sti' sat ja winike' ja b'a jastalni', ja sati mixani xchiknaji' b'a jastal jun winika.

15. Ja ye'ni jelni jitsan ja chonab' jumasa' ojtoni ya kan jakana, ja rey jumasa' mixani jas oj yal-e' ja b'a sti' ja ye'ni yuj oj jyil-e' ja jas mi aljiyab'ye'i sok oj cho sna'e' ja jasni mi yab'unejoke'i.

Isaias 53

1. ¿Machunk'iluk ja sk'u'onej ja jas kalonejtiki? ¿Sok machunk'iluk ja yalunej yab' ja yip ja Kajwaltik ?
2. Ojni k'e' yajk'achil ja b'a sti' sat ja ye'ni, jastal yech te' ja b'a takin lu'umi. Mixani xchiknaji stsamalila sok ja jastalni ja yelawi, mixani lek xchiknaji' ja b'a oj k'antiki.
3. Mi sk'anawe' sok mi skits'awe' ja winike' jumasa' , jach jun winik jel yi aj ja syajali', sna'unejxani jas sb'ej ja wokola, jachni jnak'a jb'ajtik b'a mini oj k'eltika, mi kits'ji' sok mi jk'anatik.
4. Smeranilek ye'n yi aj ja jchameltiki sok ye'n yi aj wokol sok ja b'a jyajb'elaltiki, jaxa ke'ntiki ka mak'juktik, a'a yajb'uk sok juch'ji' yuj ja Dyosi.
5. Ja ye'ni yajb'i yuj jastal mi la' k'ok'xitiki, wach'ji yuj ja jmultiki, ja jastal yi aj wokoli ya'kitik ja slamanili sok ja syajb'eli ja ke'ntiki tojb'itik.
6. Jpetsanaltik ja ke'ntiki ch'ak jpil jb'ajtik jastal yal chej, ch'ak jpil jb'ajtik b'a tuktukil b'ej, pe ja Je'obaji ye'n ch'ak skuch ja jmultiki.
7. Aji' xiwuk sok aji' cham sk'ujul, mi sjama' ja sti'i, jach jastal yal chej iji' ja b'a oj miljuki, jach jastal jun yal chej ja b'a sti' sat ja ma' ch'ak ijuk och yuji, kan ch'ab'an sok mi sjama' ja sti'i.
8. B'a najtsil lutjel sok b'a wa x-aji' ochel iji', ja b'a slame'ili, ¿Machunk'iluk ja oj xcholi'? Yuj aji' eluk ja b'a lu'umk'inal iti, yuj ja jastal mi xk'ok'xi ja jchonab'ili yajb'i.
9. Sok ti mukxisok lajan ja ma' milekuki, pe chami yuj ja b'a ma' jel ja sjas sb'aji', a'ma ja ye'ni mi sk'ulan ja jas milekuki sok mini sle'a ab'ala'.
10. Sok spetsanil jajastik iti, ja Je'obaji sk'oko', ya k'okxuk b'a oj yi' wokoli. Yuj ja lom ya'a ja sak'anil b'a oj skus ja mulali, oj yil jitsan yintil sok a'aylek k'ak'uj oj ajoyuk ja sak'anili, ja jas wa sk'ana' ja Je'obaji tini oj jitsanb'uk b'a sk'ab'a'.
11. Oj yila' satinel ja b'a xcham k'ujulili sok lekni oj kanuka, yuj ja jastal wa sna'a ojni ya' ajoyuk jitsan ma' toj ja ka'tujum ma' tojni sok ye'nani oj ch'akyi' ja b'a jastal mini lekuke'i.
12. Ja yuj, ja ke'ni ojni ka ajoyuk sok ja manaka jel niwani, sok jaxa ma' jel ja yipi ojni yi'e' lajan ja b'a oj b'ob'yujile'i, yuj ja lom ya'a ja sak'ani b'a mani chami, sok ti aji' kwenta sok ja mulanumi, ja ye'ni yitsanxani ma' yi aj ta yi' ja smuli sok sk'uman ja Dyos yuj ja ma' oj sk'ok ja mandari.